

修訂日期: 2009/04/22 發行日期: 2009/5/9

發行單位: 中華電子佛典協會 (CBETA) <http://www.cbeta.org>

資料底本: 卍新纂續藏經 Vol. 28, No. 590

原始資料: CBETA 人工輸入, CBETA 掃瞄辨識

No. 590

妙法蓮華經玄義輯略

天台山幽溪沙門 傳燈 錄

天台智者大師以五章玄義解釋經題題下義旨罄無不盡言五章者一釋名二辨體三明宗四論用五判教釋此五章有通有別通則七番共解別則五章各說例如利鈍須廣略二門也言七番共解者一標章二引證三生起四開合五料簡六觀心七會異標章令易憶持起念心故引證佛語起信心故生起使不雜亂起定心故開合料簡會異等起慧心故觀心即聞即行起精進心故五心立成五根排五障成五力乃至入三解脫門略說七重共意如此廣解五章者一一廣起五心五根令開示悟入佛之知見耳如是等義備在妙玄今輒錄彼五章大略。

初釋名為三初判通別二定前後三略正解初判通別者妙法蓮華名異眾典別也俱稱為經通也立此二名凡約三意謂教行理從緣故教別從說故教通從能契故行別從所契故行通理從名故別名從理故通此略說也若廣說者夫教本應機宜不同故部部別異金口梵聲通是佛說故通別二名也約行者泥洹真法寶眾生以種種門入如五百比丘各說身因佛言無非正說三十二菩薩各入不二法門文殊稱善大論明阿那波那皆是摩訶衍以不可得故當知從行則別所契則同求那跋摩云諸論各異端修行理無二(云云)約理者理則不二名字非一智度論云般若是一法佛說種種名大經云解脫亦爾多諸名字如天帝釋有千種名名多故別理一故通今稱妙法之經即是教之通別各賜諸子等一大車乘是寶乘直至道場即是行之通別或言實相或言佛知見大乘家業一地實事實所繫珠平等大慧等是理之通別約此三義故立兩名也。

二定妙法前後者若從義便應先明法却論其妙下文云我法妙難思若從名便應先妙次法如欲美彼稱為好人篤論無人何所稱好必應先人後好今題從名便故先妙後法解釋義便故先法後妙雖復前後亦不相乖。

三略正解為二初略解別名次略釋通名初解別名為二先釋妙法次釋蓮華妙法又二先法次妙。

法者南嶽師云法有三謂眾生法佛法心法眾生法者經云所謂諸法有如是相如是性如是體如是力如是作如是因如是緣如是果如是報如是本末究竟等天台師云依義讀文凡有三轉一云是相如是性如乃至是報如二云如是相如是性乃至如是報三云相如是性如是乃至報如是若皆稱如者如名不異即空義也若作如是相如是性者點空性相名字施設遷迤不同即假義也若作相如是者如於中道實相之是即中義也分別令易解故明空假中得意為言空即假中約如明空一空一切空點如明相一假一切假就是論中一中一切中非一二三而一

二三不縱不橫名為實相唯佛與佛究竟此法是十法攝一切法若依義便作三意分別若依讀便當依偈文云如是大果報種種性相義(云云)昔光宅法師以前五如是為權屬凡夫次四如是為實屬聖人後一如是總結權實引偈證云如是大果報大故知是實種種性相故知是權天台師云今恐不爾大義有三大多勝若取大為實者亦應取多取勝種種之名豈非多義若言權屬凡夫凡夫何意無實若實屬聖人聖人何意無權如此抑沒義不可依今明權實者以十如是約十法界為六道四聖也皆稱法界者其意有三十數皆依法界法界外更無復法能所合稱故言十法界也二此十種法分齊不同因果隔別凡聖有異故加之以界也三此十皆即法界攝一切法一切法趣地獄是趣不過當體即理更無所依故名法界乃至佛法界亦復如是若十數依法界者能依所依即入空界也十界界隔者即假界也十數皆法界者即中界也欲令易解如此分別得意為言空即假中無一二三如前(云云)此一法界具十如是十法界具百如是又一法界具九法界則有百界十如是束為五差一惡二善三二乘四菩薩五佛判為二法前四是權法後一是實法細論各具權實且依兩義然此權實不可思議乃是三世諸佛二智之境以此為境何法不收(非但即諸世諦而已)此境發智何智不發(非但觸事而真而已)故文云諸法諸法者是所照境廣也唯佛與佛乃能究盡者明能照智深窮邊盡底也其智慧門難解難入者歎境妙也我所得智慧微妙最第一者歎智與境相稱也方便品長行略說此法後開示悟入廣說此法火宅譬喻此法信解領解此法長者付子此法藥草述成此法化城引入此法如是等種種祇名十如權實法耳如來洞達究十法底盡十法邊明識眾生種非種芽非芽熟不熟可度脫不可度脫如實知之無有錯謬殃掘摩羅雖是惡人實性相熟即時得度四禪比丘雖是善人惡性相熟即不堪度當知眾生之法不可思議雖實而權雖權而實實權相即不可思議不可以牛羊眼觀視眾生不可以凡夫心評量眾生智如如來乃可評量何以故眾生法妙故故經云欲令眾生開示悟入佛之知見若眾生無佛知見何所論開當知佛之知見蘊在眾生也佛法者佛豈有別法祇百界千如是佛境界唯佛與佛究竟斯理如函大蓋亦隨大以無邊佛智照廣大佛境到其源底名隨自意法也若照九法性相本末纖芥不遺名隨他意法從二法本垂十界迹或示己身或示他身或說自意語或說他意語自意他意不可思議己身他身微妙寂絕皆非權非實而能應於九界之權一界之實而於佛法無有損減諸佛之法豈不妙耶故經云止止不須說我法妙難思佛法不出權實是法甚微妙難見難可了一切眾生類無能知佛者即實智妙也及佛諸餘法亦無能測者即佛權智妙也如是二法唯佛與佛乃能究盡諸法實相是名佛法妙也心法者前所明法豈得異心但眾生法太廣佛法太高於初學為難然心佛及眾生是三無差別觀心則易涅槃云一切眾生具足上定上定者謂佛性也能觀心性名為上定上能兼下即攝得眾生法也華嚴云遊心法界如虛空則知諸佛之境界法界即中也虛空即空也心佛即假也三種具即佛境界也是為觀心仍具佛法又遊心法界者觀根塵相對一念心起於十界中必屬一界若屬一界即具百界千法於一念中悉皆備足此心幻師於一日夜常造種種眾生種種五陰種種國土所謂地獄假實國土乃至佛假實國土行人當自選擇何道可從又如虛空者觀心自生心不須藉緣藉緣有心心無生力心無生力緣亦無生心緣各無合云何有合尚叵得離則不生尚無一生況有百

界千法也以心空故從心所生一切皆空此空亦空若空非空點空設假假亦非假無假無空畢竟清淨又復佛境界者上等佛法下等眾生法故經云修攝其心觀一切法不動不退淨名云諸佛解脫當於眾生心行中求華嚴云心佛及眾生是三無差別破心微塵出大千經卷是名心法妙也釋法竟。

二明妙者一通釋二別釋通又為二一相待二絕待相待論妙者待半字為麤明滿字為妙亦是常無常大小相待為麤妙也淨名云說法不有亦不無以因緣故諸法生即是明滿字也始坐佛樹力降魔得甘露滅覺道成即提昔之半待出於滿也般若云於閻浮提見第三法輪轉亦是對鹿苑為一待般若為第二也涅槃云昔於波羅柰初轉法輪今於尸城復轉法輪眾經皆共以鹿苑為半為小為麤待此明滿大妙其義是同今法華明昔於波羅柰轉四諦法輪五眾之生滅今復轉最妙無上之法輪此亦待鹿苑為麤法華為妙妙義皆同待麤亦等文義在此也問齊方等來滿理無殊者悉應稱妙答今亦不尅教定時那忽云齊方等耶縱令爾者別有所以何者利根菩薩於彼入妙與法華不異鈍根菩薩及二乘人猶帶方便諸味調伏方等帶生蘇論妙以待麤般若帶熟蘇論妙以待麤今經無二味方便純真醍醐論妙以待麤此妙彼妙妙義無殊但以帶方便不帶方便為異耳復次三藏但半字生滅門不能通滿理故名為麤滿字是不生不滅門能通滿理故名為妙能通滿理復有二種一帶方便通滿理二直顯滿理方等般若帶方便通滿理今經直顯滿理故中論云為鈍根弟子說因緣生滅相為利根弟子說因緣不生滅相(云云)中論偈云因緣所生法我說即是空亦名為假名亦名中道義若不即空為通真方便是故言麤若能即空是通中方便通中方便若帶即空即假通中者麤不帶空假直通中者妙(云云)問乳至醍醐同稱為滿是義云何答今以譬解譬如官有三航及以私航從於此岸度人彼岸乳教如大中兩航共度人彼岸酪教如私航度人中洲生蘇如四種小航與私航度人於中洲兩航度人於彼岸熟蘇如三航一航中洲二航彼岸醍醐如大航度人彼岸三航同是官物故俱稱滿私航非官物是故言半官物之中二航小所容蓋寡大航壯麗容載倍多獨稱為妙智者以譬喻得解也。

二絕待明妙者為四一隨情三假法起若入真諦待對即絕故身子云吾聞解脫之中無有言說此三藏經中絕待意也二若隨理三假一切世間皆如幻化即事而真無有一事而非真者更待何物為不真耶望彼三藏絕還不絕即事而真乃是絕待此通教絕待也三別教若起望即真之絕還是世諦何者非大涅槃猶是生死世諦絕還有待若入別教中道待則絕矣四圓教若起說無分別法即邊而中無非佛法亡泯清淨豈更佛法待於佛法如來法界故出法界外無復有法可相形比待誰為麤形誰得妙無所可待亦無所絕不知何名強言為絕大經云大名不可稱量不可思議故名為大譬如虛空不因小空名為大也涅槃亦爾不因小相名大涅槃妙亦如是妙名不可思議不因於麤而名為妙若謂定有法界廣大獨絕者此則大有所有何謂為絕今法界清淨非見聞覺知不可說示文云止止不須說即是絕言我法妙難思即是絕思又云是法不可示言辭相寂滅亦是絕歎之文不可以待示不可以絕示滅待滅絕故言寂滅又云一切諸法常寂滅相終歸於空此空亦空則無待絕中論云若法為待成是法還成待今則無因待亦無

所成法華首云既得無生忍亦不生無生無生即無生是名絕待降此已外若更作者絕何物顯何理流浪無窮則墮戲論乃是迷情分別絕待不絕非絕非待待於亦待亦絕言語相逐永無絕矣何者言語從覺觀生心慮不息語何由絕如痴犬逐塊徒自疲勞塊終不絕若能妙悟寰中息覺觀風心水澄清言思皆絕如黠師子放塊逐人塊本既除塊則絕矣妙悟之時洞知法界外無法而論絕者約有門明絕也是絕亦絕約空門明絕也如快馬見鞭影無不得入是名絕待妙也用是兩妙妙上三法眾生之法亦具二妙稱之為妙佛法心法亦具二妙稱之為妙若將上四種絕待約五味經者乳教兩絕酪教一絕生蘇四絕熟蘇三絕此經但有一絕若開權絕者無不入一妙絕也問何意以絕釋妙答祇喚妙為絕絕是妙之異名如世人稱絕能耳又妙是能絕麤是所絕此妙有絕麤之功故舉絕以名妙如迹中先施方便之教大教不得起今大教若起方便教絕將所絕以名於妙耳又迹中大教既起本地大教不得興今本地教興迹中大教即絕絕於迹大功由本大將絕迹之大名於本大故言絕也又本教若興觀心之妙不得起今入觀妙寂言語道斷本教即絕絕由於觀將此絕名名於觀妙為顯此義故以絕為妙今將迹之絕妙妙上眾生法將本地之絕妙妙上佛法將觀心之絕妙妙上心法前四絕橫約四教今三絕橫約圓教(云云)

昔四明祖師問學者曰法華既顯一實何故玄文釋題而明二妙門人自仁答曰法華為開權顯實之教迺一代之所歸五時之極唱若不以二妙甄之則一乘顯實妙義難彰矣且初相待論判粗妙者彼此互形曰相以他望己為待蓋待前四時七教之麤方顯法華一乘之妙良以昔日諸經機緣未熟部味教觀兼但對帶不若法華淳圓絕妙是故為麤故經云正直捨方便但說無上道已今當說此法華經最為第一以故此經純一無雜獨得妙名良有以也次絕待論開顯顯妙者絕前諸麤無可形待也蓋以法華之妙有絕麤之功故使昔日四時七教之麤一經開顯以一妙乘貫而絕之麤即是妙妙外無麤權即是實實外無權譬如神仙九轉丹砂點鐵成金一成真金不復為鐵故經曰決了聲聞法是諸經之王指汝所行是菩薩道開方便門示真實相一開之後無所間然無小無大咸歸佛界一切諸法皆是佛法更無餘乘直顯一實是名絕待論妙也然此二妙若非相待以判則不顯法華超過諸說若非絕待以開則不知法華妙一切法解釋一題陳茲二妙茲所謂抗折百家超過諸說其為吾祖乎。

通釋妙竟別釋妙者若鹿苑三麤鷲頭一妙皆迹中之說約迹開十重論妙此妙有迹有本本據元初元初本妙十重論妙迹本俱是教依教作觀觀復有十重論妙迹中有眾生法妙佛法妙心法妙各十重合三十重此與眾經論妙有同有異本中三十妙與眾經一向異此六十重一一皆有待妙絕妙則有一百二十重若破麤顯妙即用上相待妙若開顯顯妙即用上絕待妙(云云)。

釋籤云本迹各十具列在文若觀心十竝皆附在諸文之末或存或沒不別開章既其觀心寄在諸文之下今但約迹本兩門各具十妙義各攝於心佛眾生。

迹中十妙者一境妙二智妙三行妙四位妙五三法妙六感應妙七神通妙八說法妙九眷屬妙十功德利益妙云何境妙謂十如境因緣境四諦境三諦境二諦境一諦境無諦境等是諸

佛所師故稱境妙經云諸法如是相等唯佛與佛乃能究盡諸法實相實相是佛智慧門門即境也又云甚深微妙法難見難可了我及十方佛乃能知是相即境妙也智妙者所謂二十智四菩提智下智中智上智上上智七權實智五三智一如實智以境妙故智亦隨妙以法常故諸佛亦常函蓋相稱境智不可思議故稱智妙經云我所得智慧微妙最第一又以此妙慧求無上道無漏不思議甚深微妙法唯我知是相(云云)即智妙也行妙者謂增數行次第五行不次第五行智導行故故言行妙經云本從無數佛具足行諸道行此諸道已道場得成果又云合掌以敬心欲聞具足道又諸法從本來常自寂滅相佛子行道已來世得作佛即行妙也位妙者謂三草位二木位一實位妙行所契故言位妙經初天雨四華表住行向地開示悟入亦是位義乘是寶乘遊於四方四方是因位直至道場是果位即位妙也三法妙者謂總三法縱三法橫三法不縱不橫三法類通三法皆秘密藏故稱為妙經云佛自住大乘如其所得法定慧力莊嚴大乘即真性定即資成慧即觀照即三法妙也感應妙者謂四句感應三十六句感應三十五感應別圓感應水不上升月不下降一月一時普現眾水諸佛不來眾生不往慈善根力見如此事故名感應妙經云我於三七日思惟如是事又我以佛眼觀見六道眾生又一切眾生皆是吾子又遙見其父踞師子床即感應妙也神通妙者謂報通修通作意通體法通無記化化通無謀之應稱緣轉變若遠若近若種若熟若脫皆為一乘故言神通妙經云今佛世尊入于三昧是不可思議現希有事即神通妙也說法妙者謂說十二部法小部法大部法逗緣法所詮法圓詮法如理圓說咸令眾生開示悟入佛之知見故言說法妙經云如來能種種分別巧說諸法言辭柔軟悅可眾心身子云聞佛柔軟音深遠甚微妙又其所說皆悉到於一切智地又但說無上道又已今當說最為難信難解即說法妙也眷屬妙者謂業眷屬神通眷屬願眷屬應眷屬如陰雲籠月群臣豪族前後圍繞故言眷屬妙經云但教化菩薩無聲聞弟子即眷屬妙也利益妙者謂果益因益空益假益中益變易益猶如大海能受龍雨故名利益妙經云現在未來若聞一句一偈皆與三菩提記又須臾聞者即得究竟三菩提又若以小乘化我即墮慳貪此事為不可又終不令一人獨得滅度皆以如來滅度而滅度之即利益妙也。

本門十妙一者本因妙二本果妙三本國土妙四本感應妙五本神通妙六本說法妙七本眷屬妙八本涅槃妙九本壽命妙十本利益妙一本因妙者如來本初發菩提心行菩薩道所修因也若十六王子在大通佛時弘經結緣皆是中間所作非本因也若娑婆為墨東行千界方下一點點不點等盡抹為塵一塵一劫復過於是百千萬億那由他劫彌勒補處以出假智直數世界尚不能知況數其塵寧當得盡特是如來巧喻顯其長遠之相況以世智巧歷算數也文云我以佛眼觀彼久遠猶若今也唯佛能知如此久遠皆是迹因非本因也若留中間之因於後難信是故法華拂迹除疑權而非實我本行菩薩道時不在中間過是已前所行道者名之為本故名本因妙經云我本行菩薩道所成壽命今猶未盡即是本之行因妙也本果妙者本初所行圓妙之因契得究竟常樂我淨乃是本果不取寂滅道場舍那成佛為本果也尚不取中間之果以為本果況舍那始成云何是本但取成佛已來甚大久遠初證之果名本果妙經云我實成佛已來無量無邊億那由他劫又云我實成佛已來久遠若斯但以方便教化眾生作如此說即本果妙

也本國土妙者本既成果必有依國今既迹在同居或在三土中間亦有四土本佛亦應有土復居何處經云自從是來我常在此娑婆世界說法教化按此文者實非今日迹中娑婆亦非中間權迹處所乃是本之娑婆即本國土妙也本感應妙者既已成果即有本時所證二十五三昧慈悲誓願機感相關能即寂而照名本感應妙經云若有眾生來至我所我以佛眼觀其信等諸根利鈍此即本時照機之智即本感應妙也本神通妙者亦是昔時所得無記化化禪與本因時諸慈悲合施化所作神通駭動最初可度眾生故言本神通妙經云如來秘密之力又中間文云或示己身或示他身或說己事或說他事即是垂形十界作種種像驗本亦然即本神通妙也本說法妙者即是往昔初坐道場始成正覺初轉法輪四辯所說之法名本說法妙經云是諸菩薩悉是我所化令發大道心今皆住不退修學吾道法又中間或說己事或說他事驗本亦然即本說法妙也本眷屬妙者本時說法所被之人也如下方住者彌勒不識即本眷屬妙經云此諸菩薩身皆金色下方空中住此等是我子我從久遠來教化是等眾即本眷屬妙也本涅槃妙者本時所證斷德涅槃亦是本時應處同居方便二土有緣既度唱言入滅即本涅槃妙經云又復言其入於涅槃如是皆以方便分別又云今非入滅而便唱言當取滅度化緣既訖而唱入滅中間既唱涅槃例本亦有涅槃即本涅槃妙也本壽命妙者既唱入滅則有長短遠近壽命名本壽命妙經云處處自說名字不同年紀大小年即壽命大小即長短常無常也中間既爾本壽亦然即本壽命妙也本利益妙者本業願通應等眷屬八番十番饒益者名本利益妙經云又以方便說微妙法能令眾生發歡喜心即中間利益又云聞佛說壽命劫數長遠如是無量無邊阿僧祇眾生得大饒益即迹中之益迹與中間既爾例本亦然即是本利益妙也。

略引迹本二十重妙標章引證如此若廣釋者具如玄文二卷之上至七卷之下(云云)。

釋妙法竟次釋蓮華者夫世間之華有乎多種或狂華無果或有果無華或一華多果或多華一果或一華一果或前果後華或前華後果狂華無果如牡丹華等喻外道空修梵行無所克獲有果無華如廣州有木名度不華而實喻外道計自然之果此果無實一華多果如胡麻等喻凡夫供養父母報在梵天多華一果如桃李等喻聲聞種種苦行止得涅槃一華一果如柿等喻緣覺一遠離行亦得涅槃前果後華如爪稻等喻須陀洹却後修道前華後果可知喻菩薩先藉緣修生後真修此等皆是羸華不以為喻唯此蓮華華果俱多可譬因含萬行果圓萬德故以為譬又餘華羸喻九法界十如是因果蓮華妙喻佛法界十如是因果又以此華喻佛法界迹本兩門各有三喻喻迹者一華生必有於蓮為蓮而華蓮不可見此譬約實明權意在於實無能知者經云我意難可測無能發問者又云隨宜說法意趣難解二華開故蓮現而須華養蓮譬權中有實而不能知今開權顯實意須於權廣識洹河沙佛法者祇為成實使深識佛知見耳三華落蓮成即喻廢三顯一唯一佛乘直至道場菩薩有行見不了了但如華開諸佛以不行故見則了了譬如華落蓮成此三譬迹門從初方便引入大乘終竟圓滿也又三譬本門者一華必有蓮譬迹必有本迹含於本意雖在本佛旨難知彌勒不識二華開蓮現譬開迹顯本意在於迹能令菩薩識佛方便既識迹已不識於本增道損生三華落蓮成譬廢迹顯本既識本已不復迷迹但於法身修道圓滿上地也此三譬本門始從初開終至本地二門六譬各有所擬初重約佛界十如

施出九界十如次重開九界十如顯佛界十如三重廢九界十如成佛界十如三譬攝得迹門始終盡若得此意十二因緣四諦三諦等智行位乃至功德利益亦用此譬譬之(云云)第四重約本佛界十如施出迹中佛界十如第五重開迹中佛界十如顯出本中佛界十如第六重廢迹中佛界十如成本中佛界十如始終圓滿開合具足是為少分以蓮華為譬也。

多分譬者譬如石蓮烏皮在外白肉在內四微為質卷荷欲生微細眾具開華布須蓮實房成初後不異蓮華始終十義具足譬佛界眾生始自無明終至佛果十如是法無有缺減此總譬也若別譬者譬如石蓮黑則叵染硬則叵壞不方不圓不生不滅劫初無種故不生今不異初故不滅是名蓮子相一切眾生自性清淨心亦復如是不為客塵所染生死重積而心性不住不動不生不滅即是佛界如是相淨名曰一切眾生即菩提相即其義也譬如蓮子雖復烏皮污泥之中白肉不改一切眾生了因智慧亦復如是五住淤泥生死果報一切智性猶在不失是名佛界如是性故言煩惱即菩提又諸法不生般若生即其義也譬如蓮子在淤泥中而四微不污是名蓮子體一切眾生正因佛性亦復如是常樂我淨不動不壞名佛界如是體大經言是味真正停留在山草木叢林不能覆滅即其義也譬如蓮子為皮殼所籠為泥所沒卷荷在心而有生長之氣一切眾生心亦如是雖苦果所縛集惑所沈而能於中發菩提心甚大雄猛如獅子乳如獅子筋弦是名佛界如是力經言若發菩提心動無邊生死破無始有輪閻浮人未見果而能勇猛發心也譬如蓮子雖復微小烏皮之內具有根莖華葉鬚臺眾具頓足是名蓮子如是作一切眾生初發菩提心亦復如是明解決定慈悲誓願上求下化誓取成就志不疲退是名佛界如是作華首經言一切諸功德皆在初心中即其義也譬如蓮子根依淤泥而華處虛空風日照動晝夜增長榮耀頓足一切眾生亦復如是從無明際發菩提心修菩薩行出離生死入法性中因行成就值於佛日被神通風其心念念入薩婆若海此名佛界如是因經言於無量劫所作功德不如五莖蓮華上然燈佛得功德多此是真因成就即其義也譬如蓮華鬚蕊圍繞在華內蓮外此名蓮華如是緣菩薩亦復如是於真因中具足萬行六波羅蜜一行一切行資助於因如鬚在華內若得果時眾行休息如鬚在蓮外是名佛界如是緣經言盡行諸佛所有道法即其義也譬如蓮華華成結蓮而華葉零落臺子成實此名蓮子如是果菩薩亦復如是真因所感無上菩提大果圓滿究竟成實是名佛界如是果故經言佛子行道已來世得作佛即其義也譬如蓮實房臺包遶此名蓮子如是報菩薩亦復如是大果圓滿無上報足習果之果依於報果如實依臺經言如是大果報久修業所得即其義也譬如泥蓮四微處空蓮四微初後不異此名蓮子本末等一切眾生亦復如是本有四德隱名如來藏修成四德顯名為法身性德修德常樂我淨一而無二是為佛界十如本末究竟等經言眾生如佛如一如無二如即其義也是用蓮華譬十如境竟次用蓮華譬十二因緣者淤泥水草重復通如上說也即是無明支種子能生力即是行支內有卷荷華鬚備具即是識名色六入觸受支含潤愛取有支團圓盤屈不能得出即是老死支若能芽鋒萌動鑽烏皮破即是無明滅不復在烏皮內生即是諸行滅出[穀-禾+卵]即是老死滅此譬四種十二因緣也。

次用蓮華譬四諦者烏皮譬界內苦白肉譬界內集泥譬界外集水譬界外苦道滅可知此通譬四種四諦也次用蓮華譬二諦者蓮藕莖葉等譬俗蓮藕莖孔空譬真此通譬七種二諦也次用蓮華譬三諦者真俗如前四微擬常樂我淨譬中道第一義諦此通譬五種三諦也四微無生無滅譬一實諦劫初無生今時無滅譬無諦無說也用蓮華譬境妙竟。

次更譬九妙者內有生性譬中智妙卷荷生性譬空智妙鬚葉生性譬假智妙蓮臺四微生性譬中智妙此三生性譬一心三智妙也蓮子雖小備有根莖華葉譬行妙莖即慈悲葉即智慧鬚即三昧開敷即解脫又葉以譬三慈者覆水青葉譬眾生緣慈覆水黃葉譬法緣慈倚葉譬無緣慈倚荷若出蓮生不久無緣慈成得記不久又根華子葉利益人蜂即檀香氣即尸生泥不辱即忍增長則精進柔濕即禪不污即慧齊此譬行妙也蓮譬理即位芽鑽皮羸住位芽出皮細住位鑽泥欲定位齊泥未到位出泥在水四禪位禪定如水能洗欲塵處水增長譬無色位齊此譬觀行蓮華出水譬破見思相似蓮華十信位處空含而欲敷譬十住位鬚臺可識譬十行位隨日開迴譬十回向位敷舒成就荷負蜂蝶譬十地位鬚葉零落房子獨在譬休息眾行妙覺圓滿果上無事真常湛然此皆譬位妙也蓮有四微譬真性軌蓮房內虛莖藕中空譬觀照軌臺鬚圍繞譬資成軌此譬三法乘妙也蓮成處空影臨清水譬顯機顯應影臨濁水譬冥機冥應影臨風浪之水譬亦冥亦顯機應大經云闇中樹影夜影臨水譬非冥非顯機應此等譬感應妙也若風搖蓮華東昂西倒向南映北下風則合上風則開者即譬東涌西沒中涌邊沒等此譬地動瑞日暮華合譬入定瑞日出華開譬說法瑞遠望則紅近望則白赤華青葉相映輝赫譬放光瑞流芳徧野譬旃檀香風瑞葢林飄颻譬天雨華瑞風雨飄洒翻珠相榮譬天鼓自然鳴瑞此等皆譬神通妙也華合未開譬隱一乘分別說三華葉正開譬會三歸一但說一乘華落蓮存譬絕教冥理若知如來常不說法乃名多聞此等譬說法妙也從一藕邊更生一華展轉復生無邊蓮華譬業生眷屬妙從一蓮房墮子在泥更生蓮華展轉復生無量蓮華譬神通眷屬妙掘移彼藕採彼蓮子種於此池蓮華熾盛譬願生眷屬妙彼池飛來如遊絲薄霧入於此池蓮華熾盛譬應生眷屬妙魚鼈唼啣其下蜂蝶翔集其上譬眾生果報清涼之妙益見者歡喜譬於因益採用其葉譬三草益採用其華譬妙小樹益採用其蓮譬大樹益採用其藕譬妙實事益此等譬功德利益如是等譬及餘無量譬喻以譬迹中十妙(云云)。

次譬本者譬如一池蓮華始熟熟已墮落投於泥水方復生長乃至成熟如是展轉更生更熟歲月既積遂徧大池華田布滿佛亦如是本初修因證果已竟為眾生故更起方便在生死中示初發心復示究竟數數生滅無數百千本地垂應俯同凡俗更修五行烏蓮更生莖葉譬更修聖行蓮子四微稍稍增長譬更修天行荷葉始生譬更修梵行蓮子墮泥譬同諸惡更修病行蓮荷始萌譬同小善更修嬰兒行如是三世益物不可稱計徧滿法界無非分身垂迹開迹廢迹等益(云云)若非蓮華何由徧喻諸法若非妙法何由取喻蓮華法譬雙辨故稱妙法蓮華經者訓法訓常法則十界同尊常則三世不易復由聖人心口所宣故言經也釋通別兩名竟。

第二顯體者前釋名總說文義浩漫今頓點要理正顯經體直辨真性真性非無二軌欲令易解是故直說後顯宗用非無初軌偏舉當名耳夫體者一部之指歸眾義之都會也非但會之

至難亦乃說之不易文云是法不可示言辭相寂滅大經云不生不生不可說又云有因緣故亦可得說今略錄三條初論體意二正明體三引文證。

初論體意者何意須用此體釋論云諸小乘經若有無常無我涅槃三印印之即是佛說修之得道無三法印即是魔說大乘經但有一法印謂諸法實相名了義經能得大道若無實相印是魔所說故身子云世尊說實道波旬無此事何故小三大一小乘明生死與涅槃異生死以無常為初印無我為後印二印印說生死涅槃但用一寂滅印是故須三大乘生死即涅槃涅槃即生死不二不異淨名曰一切眾生常寂滅相即大涅槃又云本自不生今則無滅本不生者則非無常無我相今則無滅者則非小寂滅相唯是一實相故言常寂滅相即大涅槃但用一印也此大小印印半滿經外道不能雜天魔不能破如世文符得印可信當知諸經畢定須得實相之印乃得名為了義也。

二正顯體者即一實相印也三軌之中取真性軌十法界中取佛法界十如是中取如是體四種十二因緣中取不思議不生不滅十二支中取苦道即法身四種四諦中取無作四諦於無作中唯取滅諦七種二諦中取五種二諦五二諦中唯取真諦五三諦中取五中道第一義諦諸一諦中取中道一實諦諸無諦中取中道無諦也若得此意就智妙中簡乃至十妙一一簡出正體例可知也譬如梁柱綱紀一屋非梁非柱即屋內之空柱梁譬以因果非梁非柱譬以實相實相為體非梁非柱也屋若無空無所容受因果無實相無所成立釋論云若以無此空一切無所作又如日月綱天公臣輔主日月可二太虛空天不可二也臣將可多主不可多也為此義故須簡出正體如三軌成乘不縱不橫不即不離顯此義便須簡觀照等唯指真性當名正意分明三軌既然餘法例爾。

三引文證者序品云今佛放光明助發實相義又云諸法實相義已為汝等說方便品云唯佛與佛乃能究盡諸法實相偈中云諸佛法久後要當說真實又云我以相嚴身為說實相印身子領解云世尊說實道波旬無此事又云安住實智中我定當作佛法師品云開方便門示真實相安樂行云觀諸法如實相壽量品云如來如實知見普賢觀云昔於靈山廣說一實之道又云觀於一實境界故知諸佛為大事因緣出現於世祇令眾生開佛知見見此一實非因果之理耳經文在茲可為明證也。

第三明宗者修行之喉衿顯體之要蹊如梁柱持屋結網綱維提維則目動梁安則桷存蓋因果之宗是一經顯體之要也今略錄其三初簡宗體二正明宗三眾經同異。

初簡宗體者有人言宗即是體體即是宗今所不用何者宗致既是因果因果即二體非因果體即不二體若是二體即非體體若不二體即非宗宗若不二宗即非宗宗若是二宗即非體云何而言體即是宗宗即是體又柱梁是屋之綱維屋空是梁柱所取不應以梁柱是屋空屋空是梁柱宗體若一其過如是又宗體異者則二法孤調宗非顯體之宗體非宗家之體宗非顯體之宗宗則邪倒無印體非宗家之體則體狹不周離法性外別有因果宗體若異其過如是今言不異而異約非因非果而論因果故有宗體之別耳釋論云若離諸法實相皆名魔事普賢觀云大乘因者諸法實相大乘果者諸法實相即其義也當知實相體通而非因果行始辨因行終論

果耳。

二正明宗者此經始從序品訖安樂行品破廢方便開顯真實佛之知見亦明弟子實因實果亦明師門權因權果文義雖廣撮其樞要為成弟子實因因正果傍故於前段明迹因迹果也從涌出品訖勸發品廢迹顯本廢方便之近壽明長遠之實果亦明弟子實因實果亦明師門權因權果文義雖廣撮其樞要為顯師之實果果正因傍故於後段明本因本果合前因果共為經宗意在於此所以經分二文論本論迹雙題法譬舉蓮舉華師弟權實總在其間也。

三眾經因果同異者謂迹因果或同或異本因果永異迹因果者實相通印諸體何經不約此以論因果大品明非因非果實相為體而但因為宗般若遺蕩正是因意故云菩薩心中名般若在佛心中名薩婆若文中亦說菩薩無生滅因獲不斷不常薩婆若果觀師序云啟玄章以不住為始歸三慧以無得為終終始因果也文中亦說一切種智佛果為成般若之因因正果傍無量義宣說摩訶般若歷劫修行故知彼經用因為宗也淨名用佛國因果兩義為宗寶積具問因果佛備答因果故知雙用因果為宗也華嚴圓頓之教解宗不同或言用因為宗據題言華嚴是萬行莊飾修因之義文中說四十地行相故用因為宗又云果為宗據題云大方廣佛佛是極果之名華嚴是定慧萬善莊嚴佛身非莊嚴因文中多說舍那法身之事即用果為宗也又解云因果合為宗如言佛即是果華嚴即是因文中具說法身亦說諸地俱用因果為宗諸經對緣不同故明宗互異耳般若通對三人傍真因果此義則異別對菩薩復有利鈍為鈍明因此義亦異利人因者此義則同淨名佛國義兼若三種佛國因果此義則異一種佛國因果者則同華嚴亦對兩緣鈍異利同如前分別又將此意歷五味因果例可知是為眾經因果與迹門同異之相也二本門因果永異眾經者若三藏菩薩始行實因果無權因果乃至明佛道樹始成非久遠本迹通教菩薩亦始行因神通變化而論本迹非久遠本迹也大品說菩薩有本迹二乘則無說佛始得生法二身本迹不說久遠淨名不說聲聞有本迹但明菩薩住不思議之本迹說佛有淨土螺髻所見亦非久遠華嚴說舍那釋迦為本迹菩薩亦有本迹聲聞尚不聞不解云何自有本迹今經發聲聞有本本有因果示為二乘迹中因果發佛之迹王宮生身生道樹法身生乃至中間生法二身悉皆是迹但取最初先得真應名之為本故師弟本因本果與餘經永異今經迹中師弟因果與眾經有同有異本中師弟因果眾經所無正以此之因果為經妙宗也。

第四論用者用是如來之妙能此經之勝用如來以權實二智為妙能此經以斷疑生信為勝用祇二智能斷疑生信生信斷疑由於二智約人約法左右互論耳前明宗就宗體分別使宗體不濫今論於用就果用分別使宗用不濫何者宗亦有用用亦有宗宗用非用用用非宗用用宗非宗宗宗非用宗宗用者因果是宗因果各有斷伏為用用有宗者慈悲為用宗斷疑生信為用用若論於宗且置斷伏但論因果今明於用但論斷疑生信且置慈悲若得此意則知權實二智能斷疑生信是今經之大用其義明矣諸經不純明佛之智慧不發佛自應迹不正破廢二乘小果不斷生身菩薩遠疑起其遠信不顯本地增法身菩薩本念佛之道損界外之生如此力用眾經所無今經具之所以命章不論二乘菩薩等智純顯佛之微妙智慧不開眾生九法界知見純開眾生佛之知見餘經但道佛所變化是迹不道佛身自是迹今經自道佛身是迹其餘

變化寧得非迹今經正破廢化城二乘之果況因行耶又破稟方便教菩薩執迹為極今皆發廢悉稱是權迹及中間諸疑悉斷起遠不思議信又顯本地真實功德令法身菩薩得大利益始自初阿終隣後荼抹十方那由他土為塵數增道菩薩不能令盡蓋由如來雨權實二智一味之雨其雨普等四方俱下一切諸教四門俱破充足求於具足道者斷其深疑起其大信令入一圓因控摩訶衍車遊於四方直至道場大用大力妙能妙益猶自未盡復次此力能破二乘之果二乘怖畏生死入空取證生安隱想生已度想墮三無為坑若死若死等苦已如敗種更不還生智醫拱手方藥無用至如涅槃能治闡提此則為易闡提心智不滅夫有心者皆當作佛非定死人治則不難二乘灰身滅智灰身則色非常住滅智則心慮已盡焦芽敗種復在高原陸地既聾且瘖永無反復諸教主所棄諸經方藥不行今則本佛智大妙法藥良色身不灰如淨琉璃內外色像悉於中現令心智不滅開示悟入佛之知見令客作賤人付菩薩家業高原陸地授佛蓮華其耳一時聽十法界聲其舌隨一切類演佛音聲令一切聞能以一根遍為眾用即是今經之力用也。

上已說佛智力竟今更重說如漢末三分曹公智略當時第一復劣楊修三十四里此真丹人智不及外國外道智如芥比山一切世人外道智不及舍利弗十六分一二乘智如螢火蟲菩薩智如日光通菩薩智如鴻鵠勢不及遠別菩薩智如金翅鳥從一須彌至一須彌別菩薩智如爪上土比佛智慧如十方土當知佛之智慧至融至即至頓至實不可思議不縱不橫圓妙無比喻不可盡問答餘經不純說今經獨純說之此佛實智力大也譬如十小牛乃至一龍十龍一力士十力士不如五通人外五通不如一羅漢一切羅漢不如一目連目連不如一身子身子不如菩薩菩薩不如別菩薩別菩薩不如圓菩薩圓菩薩不如佛佛迹甚大化復作化化化無盡無謀而當如修羅琴一切賢聖無能測者佛力既如此餘諸義例可知不復記問實相體因果宗既通眾經權實二智復云何答名雖通用力大差別藏通以二智斷四住之疑生偏真之信淨名雖彈斥二乘及偏行菩薩亦是界內斷疑生信不能令小乘及方便菩薩斷大疑生大信大品通意亦是界內疑斷信生別意雖在界外亦未斷近疑生遠信華嚴正意斷界外疑生於圓信亦未斷近生遠故權實二名雖復通用而力大異今經用佛菩提二智斷七種方便最大無明同入圓因破執近迹之情生本地深信乃至等覺亦令斷疑生信如是勝力豈同眾經耶。

第五判教相者佛於無名相中假名相說說餘經典各赴緣取益至如華嚴初逗圓別之機高山先照直明次第不次第修行住上地上之功德不辨如來說頓之意若說四阿含增一明人天因果中明真寂深義雜明諸禪定長破外道而通說無常知苦斷集證滅修道不明如來曲巧施小之意若諸方等折小彈偏歎大褒圓慈悲行願事理殊絕不明竝對呵責之意若般若論通則三人同入論別則菩薩獨進廣歷陰入盡淨虛融亦不明共別之意若涅槃在後略斥三修羸點五味亦不委說如來置教原始結要之終凡此諸經皆是逗會他意令他得益不譚佛意意趣何之今經不爾結是法門綱目大小觀法十力無畏種種規矩皆所不論為前經已說故但說如來布教之原始中間取與漸頓適時大事因緣究竟終訖說教之綱格大化之筌罟其宿殖淳厚者初即頓與直明菩薩位行功德言不涉小文云始見我身聞我所說即皆信受入如來慧其不

堪者隱其無量神德以貧所樂法方便附近語令勤作文云我若讚佛乘眾生沒在苦如此之人應以此法漸入佛慧既得道已宜須彈斥即如方等以大破小文云苦切責之已示以所繫珠若宜兼通半滿淘汰如大品遣蕩相著會其宗途文云將導眾人欲過險路過此難已定之以父子付之以家業拂之以權迹顯之以實本當知此經唯論如來說教大綱不委微細網目譬如算者初下後除紀其大數不存斗斛故無量義云無量義者從一法生則於一佛乘分別說三此譬下算若收無量以入一會三而歸大者此譬除算唯記大數焉如是等意皆法身地寂而常照非始道樹逗大逗小佛智照機其來久矣文云唯以一大事因緣出現於世此照大久矣文云殷勤稱歎方便此照小久矣文云諸佛法久後要當說真實此照會小歸大久矣信解品云踞師子牀見子便識此語初鑒大機久矣於窓牖中遙見其子者此鑒小機久矣密遣二人方便附近語令勤作此鑒須開三久矣心相體信入出無難此鑒調斥久矣領知眾物此鑒淘汰久矣後付家業此鑒教行久矣當知佛意深遠彌勒不識所為因緣況下地二乘凡夫等耶文云唯我知是相十方佛亦然又已今當說最為難信難解大品已上是已說是隨他意彼不明此意故易信易解無量義是今說是亦隨他意亦易信解涅槃是當說先已聞故亦易信易解將說此教疑請重疊具如迹本二文受請說時祇是說於教意教意是佛意佛意是佛智佛智至深是故三止四請如此艱難比於餘經餘經則易若始坐道場梵王初請直言請法亦無疑網往復殷勤說諸方等觀文可知說大品時猶酬梵請唯華嚴中請金剛藏可為連類而人師偏著謂加於法華言小乘致請不及菩薩此見一邊耳身子騰眾心云佛口所生子合掌瞻仰待求佛諸菩薩大數有八萬欲聞具足道何獨是一小乘又彌勒闔眾求決文殊與解脫月金剛藏若為有異又本門中菩薩請佛說於佛法豈比菩薩請菩薩說菩薩法耶若就此意有加於彼若彼列眾十方雲集地涌菩薩皆從釋尊發心是我所化此一往則齊而不無疎密又彼明十方佛說華嚴被加者同名法慧金剛藏等不言彼佛是舍那分身今明三變土田一方各四伯萬億那由他土滿中諸佛悉是釋尊分身此意異彼彼以華嚴為勝還復出一兩句非故興毀若較其優劣恐成失指但此法華開權顯本前後二文疑多請倍不比餘經祇為深論佛教妙說聖心近會圓因遠申本果所以疑請不已若能精知教相則識如來權實二智也教意甚深其略如是。

妙法蓮華經妙義輯略(終)